



UNIVERSITÄTS-
BIBLIOTHEK
PADERBORN

**Institutionum Juris Canonici Sive Primorum totius Sacrae
Jurisprudentiae Elementorum. Libri Quatuor**

Febeo, Francesco Antonio

Coloniæ Agrippinæ, 1704

VD18 13560743-001

Tit. XII. De quibusdam peculiaribus Clericorum delictis

[urn:nbn:de:hbz:466:1-63052](https://nbn-resolving.org/urn:nbn:de:hbz:466:1-63052)

aut officii, à quo depositus est, exerceat, excommunicandus sit, *c. 1. eod.* idemque juris servandum sit, si Clericus degradatus, aut ab officio pro certis criminibus suspensus aliquid de ministerio sibi interdicto agere præsumserit, & postea ab Episcopo suo correptus, in incæpta præsumptione perduraverit. Quod si aliquis ista omnia contempserit, & Episcopus minime emendare potuerit, Regis iudicio, ad requisitionem Ecclesiæ, exilio damnetur, *c. 2. eod.*

3. Item in *cap. Clerici 3. eod.* statutum est ut si Clericus interdictus vel excommunicatus ante absolutionem Divina officia celebraverit, nisi monitus sine dilatione redierit perpetuæ depositionis sententiam pro ausu tantæ temeritatis incurrat, & etiam beneficiis omnibus spoliatur, ut habetur in *c. Fraternitati 6. eod.*

4. Eiusdem demum criminis pœna est, ut si Clericus excommunicatus vel suspensus vel interdictus exerceat solemniter sibi prohibitum actum Ordinis, saltem majoris, irregularitatem incurrat prout sumitur ex *c. 1. §. ult. de sent. excom. in 6. cap. 1. de sent. & re judic. in 6. §. ult. aliisque juribus.* Nisi tamen Divina celebraverit cum ignorantia probabili suspensionis suæ, ratione cuius excusaretur, non autem cum ignorantia crassa & supina aut erronea, quia huius generis ignorantia non excusat, *c. Apostolica 9. de Cler. excom. deposito & c.*

5. Dixi *actum Ordinis saltem majoris*, quia quoad Clericos minorum Ordinum utrum irregulares fiant ex eo quod censura ligati suorum Ordinum actus exercent, quæstio est inter Theologos & Canonistas, cujus probabilissima resolutio ea esse videtur, quam tradit Suar. *de cens. disp. 12. sect. 2. num. 10.* videlicet irregulares fieri si actum exercent solemniter, & ex proprio Officio tamquam Ministri ad id deputati, eo vestium genere, eoque tempore, loco, cæterisque circumstantiis, in quibus idem actus non nisi per Clericum ordinatum exercentur: quia tunc apparet eundem Clericum operari ut Ministrum consecratum; secus autem si actum exercent, qualiter etiam à laico fieri possit & soleat. Unde concludit ibidem idem Doctor, raro vel numquam hanc irregularitatem incurri, quia vix aliquid, aut aliquo modo faciunt Clerici in solis minoribus Ordinibus constituti, quod laici facere non consueverint.

6. Supradicta procedunt de Clerico excommunicato excommunicatione majori: si enim aliquis solum ligatus excommunicatione minori, celebrat, quamvis graviter peccet, nullius tamen notam irregularitatis incurrit: & licet eligi prohibeatur, non prohibetur eligere, vel ea quæ ratione jurisdictionis sibi competunt, exercere, dummodo non in contemptum Ecclesiasticæ disciplinæ, videlicet contra prohibi-

hibitionem Superioris, communioni excommunicatorum pertinaciter se ingesserit: in quo casu est anathemate feriendus, *c. ult. de Cler. excom. depof. &c.*

7. Aliud Clericorum delictum esset, si in aliquo Ordine, quem nondum susceperunt, ministrarent, seu aliquod ejus ministerium exercerent qualiter non nisi per constitutum in eodem Ordine exerceri potest, de quo crimine sermo est in toto tit. *de Clerico non ordin. ministr.* Decernitur etiam ibi per Sacros Canones, ut si Clericus non ordinatus (quod idem communis Doctorum sententia extendit etiam ad laicos) aliquod Divinum Officium ita exercuerit, abjiciatur de Ecclesia, seu privetur communiōe fidelium, & ad altiores Ordines non ascendat, imo & ab Ordine jam suscepto suspendatur pro arbitrio Episcopi per biennium aut triennium, ut habetur in *cap. 1. & 2. de Cler. non ordin. ministr.* sive ea suspensio extendatur, quoad omnes Ordines jam susceptos, ut videtur sensisse Hostiensis, sive solum procedat quoad Ordinem proxime & postremo susceptum, ut videtur sentire Suarez. *de cens. disp. 42. sect. 4. num. 4.* Huc etiam facit Bulla 81. Clementis VIII. *Et si alijs*, ubi de eo qui cum non sit Sacerdos, Missam celebrat, aut Confessiones audit, statuitur ut Sacris Inquisitoribus aut locorum Ordinariis tradatur

ur degradandus, ac deinde Curiaē sæculari puniendus.

8. Aliud quoque Clericorum crimen esset, si vel per saltum promoverentur, hoc est superiorem Ordinem acciperent nondum accepto Ordine inferiori; vel si Ordinem furtivè susceperent, hoc est sine consensu proprii Episcopi, aut absque prævio examine cum reliquis ordinandis se dolose conjungerent, unde post titulos explicatos sequitur in 5. Decretal. tit. de Cleric. per saltum promoti, & tit. de eo qui furtive Ordinem suscepit.

9. Si quis igitur per saltum promoveatur, puta prætermisso Subdiaconatu Diaconus ordinetur, ejus Ordinatio valida est, ut docet Glos. communiter recepta in cap. un. dist. 52. v. Subdiaconatus & supponitur in cap. un. de Cler. per saltum promoti; Sed est illicita, & in ejus poenam suspenditur à suscepti Ordinis executione, donec Ordo prætermissus suppleatur, post quem poterit Episcopus cum legitima causa ex misericordia dispensare, ita ut Ordinatus possit ministrare etiam in Ordine per saltum suscepto, dummodo tamen in eodem non ministraverit tempore suspensionis, ut constat ex eod. cap. un. de Cler. per salt. prom. & ex Trid. sess. 23. de refor. c. 14.

10. Quod attinet ad poenam eorum qui furtive sint Ordinati, distinguendum est ut distin-

guitur in c. 1. de eo qui Ord. furt. suscep. vel enim prohibitum illis erat ita furtive ordinari sub pœna excommunicationis ; vel nulla interminatio excommunicationis super hoc facta erat. Si primum, suspenduntur ab Ordine suscepto, & ad superiorem Ordinem prohibentur ascendere sine dispensatione Summi Pontificis: nisi tamen in aliquo Monasterio habitum Regularem susceperint, & in eo fuerint aliquanto tempore laudabiliter conversati: in quo casu poterit Episcopus misericorditer dispensare, ex cit. c. 1. & 3. eod. Si autem sententia excommunicationis lata non fuerat, tunc furtive ordinatus suspensus etiam erit à suscepti Ordinis executione, sed post peractam pœnitentiam dispensari poterit à proprio Episcopo, nisi alia impediunt, ex eod. cap. 1. Consonat etiam *Trid. sess. 23. de ref. cap. 8.* ubi decernitur ut si quis ab alieno Episcopo ordinetur absque testimonio Ordinarii circa ejus probitatem & mores, Ordinans à collatione Ordinum per annum, & Ordinatus à susceptorum Ordinum executione, quamdiu proprio Ordinario videbitur expedire, sit suspensus.